

經文：路加福音 24:36-48

今 á 日是復活節第三主日，tī 教會曆 tùi 復活節到耶穌升天總共有 40 工。其實在 chit 段期間聖經 ê 記事並無濟。除了福音書以外，使徒行傳 kap 哥林多前書 mà 有講起。使徒行傳只有短短 7 節 ê 記載，kap 馬太福音全款是耶穌指示學生 beh 去普天下傳福音。保羅強調耶穌復活 kap 顯現 ê 意義。「願 lín 平安！」是耶穌復活了後，對學生所講 ê 頭一句話。Tāi 先咱要認識什麼是平安，也 tiòh 知影平安是怎樣來 ê，ài 怎樣 iah ē-tàng 活得平安穩妥？

早 tī 舊約時代以色列百姓用平安互相請安，有上帝 kap 伊 ê 百姓同在所帶來 ê 祝福。以色列人只要遵守神 ê 律例，上帝 ê 祝福平安就會臨到。Nà bô 平安就會離開，所以平安有上帝賜祝福滿滿 ê 意思。到新約時代，主耶穌 m̄-nà 承續舊約 ê 傳統，同時 mà 教示講：願 lín 有這平安 kap lín 同在。基督徒對平安 ê 了解，愛 kap 耶穌基督連作伙，耶穌 bat 對學生講：「我留落來平安 hō lín, 我 kā 我 ê 平安賜 hō lín。我所 hō lín ê, kap 世人所 hō ê 無全。」(約 14:27) chit ê 平安有主 ê 赦免 ê 意思，當耶穌復活顯現 hō 信徒看見，為著建立多馬、彼得、馬利亞 chiah-ê 人 ê 信心，伊同時 kā 手 kap hiāp 下 ê 釘仔 jiah hō in 看，基督 ê 傷痕 tùi án-ne 是向 in 表示主赦罪 ê 記號。mà 是宣告一個真實 ê 平安來到，就是人 kap 神，人 kap 人，以及萬有中間所失去 ê 平安，lóng 是耶穌基督十架 ê 救贖 chiah ē-tàng 贏 tng 來。保羅 ê 批信常常用「願平安歸 hō lín」來請安，就是提醒咱平安已經透過基督賞賜 hō hiah-ê 有信心 ê 人。藉 tiòh tùi 基督來 ê 平安，死亡無 koh 成做生命 ê 驚惶，伊更新咱 ê 生命，hō 咱得 kap 上帝合好。保羅 tī 以弗所書 2:16 講：「koh 已經 tī 十字架除去 hit-ê 冤仇，beh hō 兩 pêng, tī 一體，tùi 十字架，kap 上帝和」耶穌 ài 咱奉伊 ê 名，kā 悔改 kap 赦罪 ê 信息傳遍萬國，就是 ài 咱成做 hō 人平安祝福 ê 人。Tùi 今 á 日 ê 經文咱同齊來思考現代人什事無平安？作一 ê 基督徒，咱 ài 怎樣 kā 平安 ê 訊息傳 hō 世間人？

1. 國家無平安：tī 21 世紀，世界每 ê 所在 lóng 無平安，以前咱認為美國真平安，lóng 移民來美國，因為一百外冬來美國本土 lóng 無發生過戰爭。總是 911 拍破 chit-ê 迷思 (myth)，因為咱無出門 íá 是遇著災禍。甚至一幅漫畫竟然演變成國際暴動事件，所以無一 ê 國家是安全 ê。咱 ê 故鄉，koh-khah 有中國 kng 八百外粒飛彈對準台灣。設使這是一 ê 警告，台灣人應該團結共同來保護台灣 ê 安全 chiah-tiòh。總是台灣 ê 在野黨一心想 beh 奪回政權，凡事政治化，加上媒體 ê 亂象，beh kā 台灣 íám hō 倒。可惜台灣人漸漸喪失分辨是非好歹 ê 能力，明知泛藍貪污賣國，卻常常為 tiòh 小利就賣選票。前 kúi 工 KMT 主席連戰帶領台灣 ê 大企業家訪問中國，一排排開 kah-ná 是投降部隊，chit 種做法 lóng 是致到台灣國家動亂 ê 主因。泛藍集團又是雙重標準；對陳水扁總統小 khóa 無合 in ê 意思就亂戴帽子，對馬英九卻是百般包容。Tī 美國 mà 有 chit 種 ê 例，有兩位眾議員 tī 1984 年犯罪互人送去紀律委員會。一 ê 是保守派平時反對色情 kap 墮胎，犯罪了後流目屎道歉，媒體無看著伊 ê 勇敢認錯，一再攻擊伊是偽君子。另外一位是自由人士，主張色情公開化 kap 墮胎，伊表示道德是個人 ê 行為別人無權 thang 干涉，結果媒體對伊百般包容。Án-ne 扭曲 ê 價值觀致到人 ê 道德敏感度變 kah ka 鈍，今 á 日咱教會要看清楚社會 ê 矛盾，koh-khah 要挽回 chit-ê 已經喪失

tī世俗對愛 kap 公義 ê 主權。咱要藉 tiòh 傳講主耶穌復活 ê 信息，hō公義 tī社會中 ê-thang 釘根生長，幫助政府建立一 ê 真正關心人 ê 國家，chit 份關心 tō 是建立 tī對上帝 ê 愛 kap 信靠上面。

2. 社會無平安：tī 911 以後美國人去教會 ê 比例大大增加，人 ê 心 m̄ bat 親像災難了後 hit ni 親近上帝。Chit-ê 現象說明人 ê 不安對宗教 ê 倚靠 kap òng 望，總是無 kúi 冬大家猶又麻痺 ah。tī 台灣 koh-khah ê thang 感受 tiòh 人心 ê 不安 kap 驚惶，真 chió 台灣人 bô 相過命 ê，算命仙、地理師 seng-lí chiok 好，人 ài 算命是想 beh 掌握命運，特別是七月，照黃曆甚麼 t'ai-chì lóng m̄-tang 做。舊年我 tī馬偕醫院受訓 ê 時 chūn, tú 好 tú-tiòh 七月，連看門診 ê 病人 lóng 大大減少。所以咱去病房佈道 ê 時，siōng 常吟 ê 詩就是七月平安冥。近來基督教團體針對台灣人對七月 ê 不安，提出七月平安月 ê 構想，就是 òng 望將耶穌 ê 愛 kap 平安 ê 信息帶 hō社會。
3. 個人無平安：現代社會 ê 競爭激烈，咱知影不管外表 jōa-nih-á 成功自信 ê 人，心內 iáu 是會不安，生命充滿 bē-tàng 確定 mà 無法度控制 ê 因素，憂悶、驚惶 hō 咱無安全。所以四界有人燒香拜佛，有人拼命 thàn 錢買屋；有人四界看病食補藥；有人買人壽險又加意外險、附帶平安險。總是誰 ē-tàng 保咱長歲壽永遠平安 neh? 現代人已經 kā 上帝 ngó 像化，今 á 日只要咱 phah 開電視或是電台 ê 宗教節目，你會聽 tiòh 不斷應允賞賜 ê 上帝。事業不順？婚姻 beh 合？來信耶穌，耶穌會改變一切，tùi án-ne 教會充滿著求財求利 ê 人。前 kúi 禮拜 ê 台灣教會公報登一 ê 特會 ê 廣告，指出主持特會 ê 牧師有協助財務管理 ê 大能。我不知 chiah-ê 人 kap 算命仙有什麼無全？chit 種 ê 信仰對咱 ê 生命有什麼意義？耶穌所賜 ê 平安是等待咱主動去尋找、óa 靠 kap 發現 ê，聖經教示咱，信仰是 tùi 心靈內底對上帝 ê 回應。當然信耶穌得 tiòh 福氣是主 ê 恩典，絕對 m̄ 是特會牧師 ê 祈禱。我真意愛有 kóa 教會 tī 禮拜中舉行平安禮，一方面 thang 互相祝福，若是咱 kap 兄姊有不安或是 kê-kê, thang 藉 tiòh 平安禮來化解，聖神感動咱用疼化解互相 ê 差異。只有人 kap 人、人 kap 上帝合好，chiah 有真正 ê 平安。這 tō 是為什麼耶穌復活了後，祝福講：「願 lín 平安」。

今 á 日，復活 ê 主帶 hō咱 siōng 大 ê 禮物就是平安。當咱面對人生 ê 挑戰，心中充滿著驚惶掛慮 ê 時，耶穌所賜 ê 平安 ē-tàng hō咱遠離風波，親像學生 ê 境遇一樣，雖然外在環境同款，總是 in 有勇氣到普天下去傳福音，到死也無改變。復活 ê 主應允咱會除去一切 ê 驚惶，hō咱重新站起來面對未知 ê 將來，咱 iáu 是會流目屎、掙扎，總是屬天 ê 平安會藏 tī咱心底，親像復活 ê 主出現三 pái hō不認主 ê 彼得看、hō懷疑 ê 多馬看、hō失意要離去 ê 二 ê 門徒看、mà hō迫害教會 ê 保羅看，hō in ê 靈性得 tiòh 更新，in 雖然 iáu-kú 互人繼續迫害，m̄-koh 終身平安喜樂。當咱失意 ê 時，m̄-thang 忘記耶穌 kap 咱同在；當咱信仰有掙扎 ê 時，主耶穌 mà 會幫助咱。雖然咱看 bē-tiòh，總是伊藉 tiòh 聖靈 kap 咱同在，hō咱 ê 生命 kap 復活主 ê 生命相連結。伊知影咱 ê 痛苦 kap 軟弱，雖然外面環境 iáu-kú 真惡劣，伊猶原是主導一切 ê 上帝，只要咱踏出信仰 ê 腳步，將家已交託 tī上帝 ê 手內，仰望期待，tō ē-tàng 經歷伊所祝福 ê 人生，直到咱完成世間 ê 使命。